



UKA 2017/58
10.10.17.
Peter Olsen

Timersortartut nuna tamakkerlugu unammisartut peqataanerisa taakku sulliviinut imaluunniit ilinniarnernannut sapinngisamik ajoqutaasinnaasumik kinguneqaqqunagu qanoq iliorluni timersortartut nuna tamakkerlugu unammisartut atugaat pitsanngorsarneqarsinnaanersut misissoqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Kalaallit Nunaanni Timersortartut Kattuffiat, immikkut kattuffiit kiisalu allat susassaqtartut soqutigisaqaqatigiit misissuinermt UKA2018 tikitsinnagu Inatsisartunut agguanneqartussamut peqataatinneqassapput

(Inatsisartunut ilaasortaq Nivi Olsen, Demokraatit)

Inatsisartunut ilaasortap Nivi Olsenip aalajangiiffigisassatut siunnersuutaanut qulaani pineqartumut qujalluta, matumuuna Inuit Ataqatigiinniit imatut oqaaseqaateqassaagut.

Inuiaqatigiit uagut nammineq pisuussutigisatsinnik peqqinnangitsumik inooriaaseqalersimanitta kingunerisaanik, peqqissarneqarnissatsinnut katsorsarneqarnissatsinnullu ukiumut minnerpaamik 300 mio. kr. missaat ukiuni kingullerni atortalersimavagut. Tamanna ajorpoq akuersarneqarsinna-angilarlu.

Aningaasarpaparujussuupput igalaakkut asuli igiinnartakkaagut, aningasarpassuit suliniutinut allanut, pingaarnerusunullu atorsinnaasaraluagut.

Inuit Ataqatigiit upperilluinnarparput peqqinnartumik inooriaaseqarnitsigut sukktu tamatigut inuttut, inuiaqatigiittullu aningaasarpassuarnik sipaaruteqarsinnaalluarluta. Taamaattumik...

Peqqinnartumik inooriaaseqarnikkut, peqqinnartumillu nereriaaseqarnikkut, inuup peqqissuulluni inuuneqarnissaata pitsaasumik aqutissiuunneqarnissaa Inuit Ataqatigiit pingaartitatta anguniakkattalu ilagilluinnarpaat.

Timersorneq tassaavoq peqqinnartumik inuuneqalernissamut aqutissat periarfissallu pitsaanerpaat ilaat.

Naluneqangitsutut 2015-imi upernaakkut ataatsimiinnitsinni Inuit Ataqatigiit sinnerlugit timersorneq pillugu immikkut inatsisiliortoqarsinnaalerniassammat, timersorneq pillugu inatsisissamik suliaqaqqullugit Naalackersuit peqquneqarnissaannik inatsisartut aalajangiiffigisassaattut siunnersuuteqarnikuuvunga. Inatsisartunit akuersissutigineqarnikuuvoq, Naalackersuisullu suliassartik upernaakkut 2016-imi naammassivaat, timersornerlu pillugu inatsit nutaaq ukioq manna 2017-imi atuutilersinneqaqqammerpoq.

Timersorneq pillugu immikkut inatsisiliortoqarnissaanik siunnersuuteqarnitsinnut tunngavilersuutit-ta ilagaat, kikkulluunniit timersornerup silarsuaata iluani aallutaqartut sukku tamatigut pitsaanerusement atugassaqaalerlutillu pitsaasup tungaanut aqutissiuunneqarsinnaalerniassammata.

Minnerunngitsumik nunanut allanut unammisartuutitta pitsaanerusunik atugassaqaartinneqa-lernissaat siunertaralugu immikkut ittumik timersorneq pillugu inatsisiliortoqarnissaa kissaatigisi-masatta ilagivaat.

Taamaattumik naatsumik oqaatigissaganni timersortartut timersornerup silarsuaata iluani aallusaqartut pimoorussigunik pimoorussingikkunilluunniit ineriartoqqinnissaminnut pitsaasumik sinaakutissamik inatsit tunngavigalugu tunngavissaqarlualereersimasut Inuit Ataqtigiinniit isuma-qarpugut. Suliaq sunaluunniit pitsaanerujuaannarsinnaammat inatsit pilersinneqarsimasoq arlaatigut ippinnartoqarsimappat amigaateqarsimappallunniit, pitsaanerulersinniarlugu allannguutissamik siunnersuuteqartoqarsinnaajuaannarpoq.

Kulturimut Ilinniartitaanermut Ilisimatusarnermut Ilageeqarnermullu Naalakkersuisup Nivi Olsenip siunnersuutaanut akissuteqaataa paasilluarlugulu ilalerusupparput.

Naalakkersuisup akissuteqarnermini tunngavilersuutai taperserlugillu ilalerusuppagut. Ilumoorpoq ullumikkut nunanut allanut unammisartortatta atugaat qangamut naleqqiullugit pitsaanerujussuan-ngornikummata. Timersornermut immikkut inatsiseqalersimanitta saniatigut, nunanut allanut unammisartuq ilinniartuusimaguni taava ullumikkut ilinniagarnermusiaqartarneq pillugu Nammi-nersorlutik Oqartussat peqqussutaat nr. 9 19. juli 2017-imeersoq malillugu ilinniagaqarnermusiani annaangikkaluarlugit, ilinniarnini qimakkallarlugi nunanut allanut unammisartutut peqataasinnaalernikuuvoq.

Taassuma saniatigut soorlu aamma Naalakkersuisup oqaatigigaa, nunatsinni timersoqtigiiffiit kattuffiat aammalu Elite Sport Greenland anguniagassalersuinissaq pillugu isumaqtigiissuteqarnikuuvugut.

Tamakku tamaasa ataatsimut isigalugit timersornerup iluani, nunanullu allanut unammisartuqar-nerup tungaatigut atugassarititaasut sinaakutissat tunngavissallu ullumikkut pioreersut naammaginarluinnartuusutut Inuit Ataqtigiinniit isumaqarfigaarput.

Taamaattorli ataatsimik ajornartorsiuteqarpugut. Tassalu aningaasat. Soorlu Naalakkersuisup akissuteqaammini ilaatigut eqqaagaa aningaasanut inatsimmi kontumi pingaarnermi 40.94.13 Timersornermut tapiissutit, 2018-imi aamma atortuusussatut siunnersuutaasumi aningaasanik 250.000. kr.-nik immikkoortitsisoqarnikuusimasoq, nunanut allanut unammisartuutitta nunanut allanut unammiarternermi akissarsiaraluaminnik annaasaqarnerminnut taartisiassaqaqarnissaat periarfissikkumallugu.

Ukiorpasuarni kontomut tassunga aningaasaliissutigineqartartut allanngortinneqartarsimangillat.

Inuit Ataqtigiinniit isumaqarpugut aningaasat taakku 250.000,- annikippallaarujussuuartut. Amerlanerujussuusariaqartut Inuit Ataqtigiinniit isumaqarpugut.

Assersuut:

Isikkamik arsaattartut nunanut allanut unammisartut 20-uppata assersuutigalugumiatagooq inuit qulit suliffeqartuupput qaammammullu agguaqatigiissillugu 25.000 kr.-nik qaammammusiaqarlutik.

Qaammat ataaseq sungiusarlutillu angalasussanngoramik qaammat ataaseq sulinngitsoortussanngorput qaammallu ataaseq akissarsiassaralutik annaasussanngorpaat. Tassa taava imaappoq inuit qulit qaammat ataasiinnarmut katillugu 250.000,- minnerpaamik taarsiissutissatut atoreersimalissavagut.

250.000,- qangaammalli nungoriikatappagut, aali qaammataannarmut timersoriaatsimullu ataasiinnarmut aningaasat taakku atorlutigit.

Naammi taava assammik arsaallutik unammisartuutitta, ujakkaartartuutitta, tae kwon-do-ertartu-utitta, nerrivimmiluunniit arsaarartartuutitta aningaasassaasat? Soqanngilaq nunguutereerpagut.

Tamanna pillugu Inuit Ataqtigiinniit aningaasanut inatsisissamut 2018-mut tunngatillugu isumaqtigiinniarnitsinni isumaqtigiinniutitta ilagaat kontomut pingaarnermut 40.94.13-mut aningaasaliisuutissattut pilersaarutigineqartut 250.000 kr.-usut minnerpaamik 1 mio. kr.-imut qaffanneqarnissaat.

Taamaattumik naggataatigut Demokraatit aammalumi partiit allat tamaasa kaammattorusuppagut timersornermik pingaartitsigunik, nunanullu allanut unammisartoqarneq pingaartikkunikku taava 1 mio. kr.-nut qaffaaniarluta isumaqtigiinniarnitsinnut peqataaqqullugit taperseeqataaqqullugillu.

Taamatut oqaaseqarluta, aappassaaneerneqarnissaa sioqqullugu oqaluuserisassamut attuumassuteqartut tamarmik tusarniaavigineqaqqaarniassammata, oqaluuserisassatut siunnersuut Inuit Ataqtigiinnit ataatsimiisitaliamut susasaqartumut ingerlateqqinneqarnissaa inassuteqaatigaarput.

Qujanaq

Peter Olsen